

Yozue 1

Dios ta duna Yozue instrukshon

1.

1. Despues di morto di su sirbidó Moises, Señor a bisa Yozue, yu di Nun i man drechi di Moises:

2. “Mi sirbidó Moises a muri, awor prepará bo pa krusa riu Yordan ku henter e pueblo di Istraél, pa bai e pais ku lo Mi duna nan.

3. Manera Mi a primintí Moises, lo Mi duna boso tur lugá kuminda boso pone pia.

4. Boso teritorio lo kore for di e desierto i e serunan aya di libanon te na e riu grandi Euftrat. Henter e pais di e hetitanan, te na laman Mediteráneo na parti wèst lo ta di boso.

5. Tanten bo ta na bida niun lo no por resistí kontra bo. Lo Mi ta ku bo, meskos ku mi tabata ku Moises. Hamas lo Mi laga bo ni bandoná bo.

6. Sòru pa bo ta fuerte i balente. Bou di bó guia e pueblo aki lo heredá e pais ku Mi a hura di duna nan antepasadonan.

7. Un kos si: sòru pa bo ta fuerte i balente. Atené bo na henter e lei ku mi sirbidó Moises a duna bo. Kumplí ku e lei sin desviá niun kaminda. E ora ei tur loke bo hasi lo bai bo bon.

8. No stop di lesa e buki di lei aki nunca; meditá riba dje di dia i anochi i hasi presis manera tin skibí den dje, pasombra e ora ei lo bo logra bo metanan i lo bo tin éksito.

9. Kòrda ku Mi a bisa bo pa bo ta fuerte i balente. No tene miedu ni laga niun hende spanta bo, pasombra Ami, Señor, bo Dios, lo ta ku bo unda ku bo bai.”

Yozue ta prepará pa konkistá Kanaan

10. E ora ei Yozue a duna e lidernan di e pueblo òrdu:

11 “Pasa dor di e kampamentu i bisa e hendenan: ‘Prepará kos pa kome na kaminda, pasombra denter di tres dia boso lo krusa riu Yordan i tuma e pais ku Señor, boso Dios, lo duna boso komo propiedat.’ ”

12. I Yozue a bisa e tribu di Ruben, e tribu di Gad i e mitar tribu di Manase:

13. “Kòrda loke Moises, e sirbidó di Señor, a ordená. El a bisa ku Señor, boso Dios, a duna boso sosiegu den e pais aki.

14. Boso kasánan, yunan i bestianan por keda atras den e pais ku Moises a duna boso e banda aki di rui Yordan. Pero tur e hende hòmbrenan balente mester sali dilanti di nan rumannan,

15. te dia Señor duna nan tambe sosiegu, meskos ku El a duna boso. Yuda nan te dia nan tambe tuma e pais ku Señor, boso Dios lo duna nan komo propiedat. Despues boso por bini bèk na e pais ku Moises, e sirbidó di Señor, a duna boso pariba di riu Yordan, i keda biba aki definitivamente.”

16. Nan a kontestá: “Nos lo hasi tur loke bo ta ordená nos i bai unda ku bo manda nos.

17. Meskos ku semper nos a tende di Moises, nos lo tende di bo tambe. Mare Señor, bo Dios, por ta ku bo manera E tabata ku Moises.

18. Tur esnan, ku nenga di obedesé bo òrdunan i keda surdu pa bo palabranan, ora bo manda nan hasi kiko ku ta, mester muri. Sòru si pa bo ta fuerte i balente!”